

Ineqarnermut, Attaveqarnermut Angallanermullu Naalakkersuisoq  
Medlem af Naalakkersuisut for Boliger, Infrastruktur og Trafik

Naalakkersuisut Siulittaasuata tullia  
Viceformand af Naalakkersuisut

Inatsisartuni ilaasortaq Naaja Nathanielsen, Inuit Ataqatigiit  
-/Maani

### § 36 naapertorlugu nutaanik sanaartornerni avatangiisinut tunngatillugu apeqqummut akissuteqaat

*Ukiuni aggersuni sanaartornikkut pilersaarutit eqqarsaatigalugit taakkunanilu mingutsitsinerup annikillisarnissaa siunertaralugu Naalakkersuisut qanoq pilersaaruteqarpat, tassani assersuutigalugu annikitsumik ikummatissatigut atuisunik CO2-millu aniatitsinngitsunik sanaartornerit aamma nammineq ikummatissatigut pilersortunik sanaartornerit eqqarsaatigalugit?*

16. oktober 2009  
Sags nr. 2009-021177  
Dok. nr. 241962

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: aan@gh.gl

Illuutini nukimmik atuneq nunatsinni nukissiornermut naatsorsuutini najoqqutassaamat pingaarutilik Naalakkersuisut eqqumaffigisorujussuaat.

Inatsilerinermut tunngatillugu 2010-mi upernaakkut ataatsimiinnermi sanaartornermut inatsisissatut siunnersuummik saqqummiussinissartik Naalakkersuisut siunnerfigaat. Siunnersuutip pilersaarusionermut nunaminertanillu atuinermut Inatsisartut peqqussutaanni illunik sanaartornermut, sannaanut ilusilersuisarnermullu maleruagassanik aalajangersaanissamat inatsisitigut tunngaviummut taartissatut eqqarsaatigineqarpoq.

Inatsisissatut siunnersuummi illoqarfiup illutaanni isumalluutininik pisariaqanngitsumik atuisarnermik akiuisinnaasunik suliniuteqarnerusinnaalernissaq, kiisalu atortunik avatangiisinut mingutsitsinngitsunik atuisarnerup siuarsarneqarnissaa siunertaasut arlallit ilagaat. Tassalu illuliornermut malittarisassani illuni pioreersuni taamatullu illuni nutaani nukimmik pisariaqanngitsumik atuisarnerup akiorniamissaanut aalajangersakkanik aalajangersaasoqarsinnaanissaa siunertarineqarpoq. Taamatuttaaq illuni pioreersuni nutaanilu aatsitassanik pisariaqanngitsumik atuisarneq akiorniarlugu aalajangersaasoqarsinnaalissaaq, tassunga atortunik sannanillu aalajangersimasunik atuisarnermut, aammalu atortunik atueqqittarnermut aalajangersakkat ilaatinneqarlutik.

Illut kiassarnermut oqorsaatissaannut nukimillu atuinerinut piumasaqaatit Illuliornermut Malittarisassat 2006-ip (BR 06) saqqummersinneqarneratigut sakkortusineqarput. Illuliornermut Malittarisassani nukissiornermut aalajangersakkat sakkortuseqqinneqarnissaat Ineqarnermut, Attaveqarnermut

Angallanermullu Naalackersuisoqarfimmi suliarineqarpoq. Illut ussissusissaannut piumasaqaatit sakkortusineqarnissaat siunnersuutigineqarpoq, illup silataata qalliutaani ussiinnersat aqutigalugit silaannaap taarserarsinnaanerani nalliiineq aalajangersimasooq qaangeqqusaajunnaassalluni. Illuliap naammassineqarsimasup uuttortaaffigineqarneratigut ussissutsip uppernarsarneqarnissaa illuliornermi oqartussaasut piumasarisinnaavaat. Maleruagassat sakkortusisat BR 06-imut ilassutitut 2010-miit atuutsinneqalernissaat naatsorsuutigineqarpoq.

Ilisimatitsissutigineqarsinnaavoq, A/S Inissiaatileqatigiiffik INI illut ussissusaannut uuttuutini pisereersimammat. Atortut ilaatigut Nuummi Tuapannguani inissiat 210-t sananeqarnerini sanaartukkat pitsaassusaannik misissuinermit atorneqarsimapput.

Aamma BR 06-imut ilassutitut nukimmik annikitsumik atuinissamut killissarititaasut, illuni nukimmik annikitsumik atuiffiusussatut sananeqartuni nukimmik pisariaqartitsinerup akuerineqartup aalajangersarneqarnissaanut atugassat suliarineqassapput. Illuni nukimmik annikitsumik atuisuni klasse 1-ini aamma klasse 2-ni nukimmik atuinissamut killissarititaasut, BR 2006 naapertorlugu maanna nukimmik atuinermi killissarititaasut 50 procentiinik aamma 75 procentiinik annertussuseqarnissaat siunnerfigineqarpoq. Nukimilli annikitsumik atuinermi killissarititaasut atorneqarnissaanni aallaqqaammut nammineq piumassuseq aallaavigineqassaaq.

Illut kiassagaanngitsut Europami pitsaassutsit tunngavigalugit maani nunatsinni sananeqassagaluarpata, oqorsaatissat 80-85 cm-inik issussuseqartussaapput. Oqorsaatit issussusissaannut assersuutitut oqaatigineqassaaq, illuni nukimmik annikitsumik atuisuni klasse 1-ini matuma siuliani taaneqartut tunngavigalugit affaat inorlugit atorneqartussaammata. Tamanna ilaatigut nunat tamat akornanni ataatsimeersuarnermi "Cold Climate HVAC 2009"-imi, ukioq manna marsip ulluisa 16-anniit 19-annut Sisimiuni ingerlanneqartumi saqqummiunneqarpoq. Illut kiassagaanngitsut 80 cm-inik issussusilinnik oqorsaasikkat nunani issittuni qanoq inneri killeqartuinnarmik misilittagaqarfineqartut tassani aamma erseqqissarneqarpoq.

Nunani issittuni illunut nukimmik annikitsumik atuiffiusunut, pingaartumillu illunut kiassagaanngitsunut teknologimut aaqqiissutissat ineriartortinneqarnerinut atatillugu unammilligassat tupinnanngitsumik annertupput. Naalackersuisut suliasaqaarfimmi ilisimatusarnermut ineriartortitsinermullu malinnaapput, tamatumani sanaartornermut malittarisassat naleqqunnerpaamik naleqqussarneqarnissaat, taamaalillunilu nunatsinni sanaartorerup aamma silap pissusaa avatangiisillu eqqarsaatigalugit pitsaasumik ingerlanneqarsinnaanissaa ilusilersorneqarsinnaanissaalu siunnerfigineqarluni.

Inussiarnersumik inuulluaqqusilluta

Jens B. Frederiksen